

四庫全書

集部

欽定四庫全書

集部

倪文僖集卷二十五

六

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官中書_臣汪學金

謄錄監生_臣錢敬熙

欽定四庫全書

倪文僖集卷二十五

明 倪謙 撰

跋

書抱杲子集後

盈天地間凡物之有聲而鳴者皆軋於一元之氣使然
若雷之轟鉤風之刀蕭水之砰湃木之吟號獸之吼鳥
之嚶蟲之噪其聲之發為氣所軋雖欲不鳴而不可得

也他若竅於竹絀於絲虛於金冒於革其為聲也雖假
於人以鳴謂非軋於是氣不可也惟人也得是氣而理
寓焉情鬱於中則聲必發於外其音響節奏長短疾徐
亦皆出於自然而不容不鳴者也故其為聲可歌可誦
可喜可愕上而朝廷學士大夫鳴國家之盛下而委巷
肖夫女婦自鳴其情者何莫非是氣之所為乎此君子
所以貴養其氣氣得其養則聲之鳴者自不涉於凡近
矣金陵孫政秉忠甫先世以武功官揮使至君食祿不

事事雅志恬靜隱居鳳臺杏花之村工繪事喜吟詠其所往還非帶笈簞之翁則負襁褓之叟蕭然物外與世相遺胸中苟有所得輒形諸聲詩文辭以鳴其情之所欲言幽清閒淡脫塵絕俗盖有莊生逍遙屈子遠遊之趣焉非其浩然之所發耶秉忠嘗錄以見示題曰抱杓子集抱杓其自號也君子即是集而觀之固足以知其所養者矣

恭題寵榮錄後

永樂中太宗皇帝北巡仁宗皇帝監國時則有春坊庶
子進詹事府少詹事鄒濟職輔導侍左右敦厚純誠端
慎和易文詞雅贍才德老成啓沃匡贊多所裨益上遽
於聖學好文重士於公心志契愜眷顧特厚恒有詩及
手札以賜公歿上登極追念舊德賜誥祭贈太子少保
諡文敏其子南京禮部尚書榦繕寫為副景為一帙名
曰寵榮錄鈹梓以傳出示臣謙且告之故曰先人所得
宸章凡八紙第一紙為丁酉冬至朝賀畢上遣中使陳

昂賜有羞十卓于家并賜此詩第二紙已亥春隨侍皇
太孫五皇孫朝京陛見文廟喜曰這老秀才還好時為
善陰隲書新成未頒特賜一本留月餘遣還上遣中允
黃琮賜醃鹿五隻內醢五十瓶至滁迎勞并賜此詩第
三紙有進讒誣構者文廟曰這老秀才是朕所除者置
不聽上聞之喜賜此詩慰安第四紙上因皇孫進學孝
愛賜此詩褒勞其後四紙一則索書一則答問安一則病中
寬慰一則諭祭者也臣諫聞之沐手捧誦伏睹聖製有賢良

作輔翊及鼎鼐得其人之句慰札則云卿之苗裔余為提挈必不使墜入蓬蒿之流諭祭則云勅有司建享堂置墳戶歲時致祭嘉愛之情顧後之恩卹終之義藹然溢於言表三復仰歎聖德如天所以待公者若是其重公之事上以道所以得君者若是其深皆可見焉觀之當時寵遇之隆君臣道合哀榮終始者蓋惟公一人而已猗歟休哉慨今宮車上賓公亦侍游霄漢而天葩麗藻粲然具存公之子孫固宜保之於億萬年矣然天下

後世得是錄觀之則知仁廟資賢樂善之誠形諸賦詠
其與帝舜明良之歌成王敬之之頌夫何異歟軫起家
進士茲果不墜蓬蒿致位宗伯清慎端介紹休前聞為
時名臣克副上之所期於昭在天之靈其必有知而忻
慰矣自今子孫尚繼承家學出為世用以無墜先業無
忘聖德哉謹拜手稽首而識其後

跋楊文貞公書途中詩留別李勉菴

正統四年少師楊文貞公奉命歸省于廬陵途間多有

所作至清河手書以遺太守李公信圭詩雖止十一首
而其重交情感今昔念君親重死節乃具見焉不獨辭
致高遠而字畫亦奇逸心志之存可識矣公文章為世
所重未嘗輕以示人而以遺清河則清河為公所重又
可識矣今為清河子冬官副郎遇所藏豈非李氏之家
寶歟公之詩有東里集傳於世以今考之十一詩皆無
焉豈其錄刻者早而晚年者有未及歟有若是軸者存
後人得以徧采而續刻之庶無遺珠之惜也

跋王文端公論李勉菴文手墨

太保王文端公與郡守勉菴李公同鄉相友善文端在翰苑者四十年文名滿天下勉菴嘗典文衡然以歷官郡縣故文名殆為政事所掩耳今觀文端評勉菴之文謂皆有理趣非苟作者則勉菴之作豈飾輪轅者乎又舉歐陽文忠公三多之說告之予以謂三多以讀書多為本書讀既多文不求工自工矣所謂讀書破萬卷下筆如有神也二公以是相規益其有得於文忠者深矣

豈不足以見其淵源之所自歟勉菴子冬官副郎遇敬父之執寶藏是帖于家其賢也已

跋盧廷佐所藏先世田叟醉歸圖

姑蘇盧文義先生好古博雅家藏法書名畫甚多此卷畫騎牛醉叟筆意精工因無題識漫不可知故說者不一或以其冠帶謂為田畯或以其帽插牡丹謂為洛陽賞花者未知果得作者意否大抵時和歲豐穡事有成少有所給老有所養故於春時祈年制為酒食以相燕

樂而田野之間有此醉歸之叟也其亦摹寫太平之氣象歟夫農衣食之本天下之至勞者也今觀此叟陶然醉飽而得此一日之樂豈不可喜孰知其沾體塗足而竭彼三時之勤為可憫乎此君子所以當知稼穡之艱難也先生珍藏此卷意良在是其子愛竹翁暨孫福建叅議廷佐相繼什襲手澤如新其克承世德者哉

跋香山九老會詩

廬陵香山乃王公恒安所居成化庚寅秋恒安弟益安

自河南歸友竹周公偕弟仁迪遜菴陳公往賀至則會
恒安及弟利安子姪省孚墨庄劉公於在春堂凡九人
年逾八十者二人八十者一人逾七十者一人近七十
者五人益安開筵以齒序坐皆蒼顏皓首笑歌為歡友
竹首為七言詩以倡序以紀之八人者皆屬和金春王
應鏘然成什誠一時之嘉會舉世之鮮有者矣友竹之
子琬繪而為圖刻梓以傳而屬題其後昔唐白樂天嘗
於香山履道宅為尚齒會預者九人今友竹之會地名

人數皆與之同豈偶然哉樂天作詩有曰除却三山五天竺人間此會更應無誇美如此孰知今日友竹之會遂與相埒安可謂此會之更無哉况樂天會上皆拖紫紆朱之客而友竹諸老不過三四世家宗族世姻鄉閭逢掖樂道高隱之賢尤為難得其視壤叟芝翁又何異哉但不知此會此夕太史曾奏德星之聚否也予與友竹數十年前嘗遊冶城登高賦詩為樂闊別既久復見其有茲會之樂知其賞心樂事雖老而未倦也故喜而為

之書

恭題永樂四年御賜新進士魯穆還鄉勅

國家之於賢材鼓舞作興獎厲而振拔之則賢材孰不感激思奮砥礪名節以祈不負於知遇也哉伏覩永樂四年太宗皇帝賜進士魯穆歸榮之勅玉音諄切始終以聖賢之學勉之又以自滿自怠戒之其期望於臣穆者至矣為臣穆者果能不負聖諭由進士拜官福建道監察御史陞福建按察僉事超拜行在都察院右僉都

御史歷官中外三十餘年冰蘖之操始終一節受知列
聖宣宗皇帝賜誥有廉敏剛方焯有風烈之褒英宗皇
帝賜祭有卿以先朝進士久歷風紀允操廉潔之譽則
知臣穆賴聖化之所陶成亦已深矣今臣穆有子臣崇
志克篤前烈世躋其美亦由進士拜給事中陞南京太
僕寺少卿超拜應天府尹清聲雅操接武芳猷寶藏是
勅出以徵題詩曰豈弟君子遐不作人又曰世之不顯
厥猷翼翼其魯氏父子之謂矣莊誦之餘謹拜手稽首

而書其後

題三舍劉氏族譜後

自五宗九兩之法廢學士大夫能知其先者有氏族之志存焉唐初惡故家以門地相高乃取其說一槩而非斥之至唐衰而譜學亡矣宋歐蘇二家始為世譜後有作者咸宗焉故程夫子嘗曰管攝天下人心收宗族厚風俗使天下不忘本須是明譜系立宗子法又曰宗子法廢後世譜牒尚有遺風譜牒又廢人家不知來處無

百年之家骨肉無統雖至親恩亦薄是知譜牒之修其可後乎南京太常少卿安成劉公紹和博學慎行篤於宗族取先世譜牒而續修焉始於南唐工部尚書適其後三世孫以下相繼皆補成均鄉人遂目為三舍劉氏傳至三世孫南壽始為之譜十五世孫埴嗣修之又四世至紹和復續之自宋元以及我朝歷年五百有餘歷世二十有四由根達支汭流窮源昭穆世次一覽具見其所以收宗族厚親恩者實賴於茲可謂能尊祖敬宗

不忘其本者矣末復作簪纓一志其有望於後人者豈
淺哉夫不有作之後將何述不有續之前將何傳今劉
氏作之續之世有其人得不傳述於無窮哉後之人繼
繼繩繩皆務學修德以光昭先烈庶不負紹和之所望
矣遂題其後以告其宗人

書王亞卿救災奏疏藁後

孟子曰有安社稷臣者以安社稷為悅者也夫社稷之
安者由民安也書曰民惟邦本本固邦寧是以古之大

臣以安社稷為心者無不以安民為務視民之饑寒困苦必求有以安之不惟身任其責又必聞之於朝以冀言之必行非安社稷之臣抑何能若是哉予於今南京戶部亞卿王公見之矣公於成化九年為刑部侍郎時奉命總理河道因見自京師抵揚州頻年旱饑臨清武城至德州又有黑氣之異民多流亡雨澤少降具疏言狀乞朝廷遣祭山川之神祈禱雨澤及詔廷臣講究弭災卹患之策皇上覽其所奏惻然興嗟即下詔盡蠲山

東稅糧順天被災處所亦量減免仍發倉儲出內帑以賑濟之仍遣禮部侍郎劉吉祭告東岳鎮東海之神凡其所言一一舉行皇上敬神卹民之心如是是以天心昭格災沴頓消遂致畿甸山東之境雨暘以時歲大豐稔粒米狼戾民食以充天人感應之機何若是其速也哉嗟夫上有願治之君則下必有興治之臣惟聖明在上聽言如流憂民之憂而仁覆四海故公道合計從得行其言而惠洽羣黎也仁人之言其利不亦溥哉蓋公

登進士第八翰林居棘署出典大郡任藩伯擢都憲而
進今官學博才宏清方慎密故所至政善民安蜚英騰
茂而又知無不言言無不納用致冀北山東百萬蒼生
咸遂生息而邦本由之以固所謂安社稷之臣非公其
誰歟予知公將來之德業日益大矣三復之餘敬書此
以識其後

書玉亭題名記後

南京翰林院後舊有亭環植以竹侍讀學士雲間錢先

生學富才雄以文章鳴海內服外夷及居閒於家朝廷
念其舊學復起用於南院先生至號其亭曰玉亭因念
我國初至今掌院事者氏名無紀實為缺典乃稽故牘
題其氏名刻石置亭中使後來者有考甚盛舉也謙於
成化丙戌夏嘗奉命南院視事未行而遷禮部則南院
者謙亦嘗授任於斯者也南京太常少卿西蜀李公立
之安成劉公紹和皆輟翰林講讀而來相與嘉刻成而
往落之併識歲月於後云

題白鶴山人傳後

韓昌黎嘗稱燕趙古多慷慨豪傑之士如郭隗樂毅荆軻蔡澤之流皆其人也今觀白鶴山人豈非襲其遺風者歟山人名瑄字韞輝仕至尚寶卿大司徒夏忠靖公之子也山人雖世居楚而實生燕趙間好俠而任氣有朔方之餘習少馳馬試劍喜論兵志欲有為於世而落
落與世難合嘗三上章欲募兵北出祁連不果乃去而
西遊華山南望匡廬越洞庭上衡岳返櫂黃鶴磯下泝

襄漢以歸博物洽聞不下司馬子長所至感今懷古慨
念時事輒形論議發為詩辭浩瀚而洪放皆鑿鑿可行
世寡知者獨兵部王亞卿知其人嘗薦其有經濟才時
不能用山人益韜晦晚求南都便祿以養母然山人負
其奇崛不少屈節於人用不用一付於命故作白鶴山
人傳以見志予讀之而為題其後曰

平生磊落負材雄爭向明時惜未庸白鶴不知高幾許
山人氣節擬相同

紛紛肉眼笑狂迂誰識經綸志有餘莫道山人無膽氣
也曾三上靖邊書

題韓公大傳後

天佑國家莫先於生賢佐故必有命世豪傑之才出際
文明之景運弘太平之盛業初非偶然之故也若右都
御史韓公鍾淳粹之秀氣全英毅之美質文章政事之
兼優文事武備之並懋四方賴之以平王國賴之以定
勲業炳炳照映今古非上天生是異材以保佑於我國

家也歟觀學士錢公所作公之大傳可以見公之為人矣公生而姿稟異常幼已為人所奇矣及長而甫冠輒領鄉薦登進士高第拜監察御史陞廣東副使擢都察院右僉都御史巡撫江西改山西副使召陞大理少卿尋復右僉都御史奉勅巡撫大同宣府陞兵部右侍郎出為浙江左叅政未幾拜左僉都御史督征兩廣蠻寇尋陞左副都御史提督巡撫兩廣加賜綵幣以勞之聞父喪守制勅陞右都御史起復總督兩廣軍務開總府

於梧州得便宜行事久之引疾乞退上初不允乞休不
已乃賜致仕此公歷官之槩也其為御史也辯冤獄平
寇賊能聲蚤著巡撫江西也均徭役定歲辦賑饑民効
不法其居臺端也事有枉抑者輒固諍之多得伸雪其
鎮邊方也廣儲蓄却強敵嚴軍法軍中震慄其征南也
提兵擣賊大藤峽破之餘寨悉平威名大振其奇謀妙
算舉無遺策廣人為立平蠻碑以紀其績其他籌畫悉
合機宜此公政績之槩也且其胸次軒豁機神明敏藻

思英發沛然莫禦心地坦夷不設城府誠命世之豪傑也非天為國家生之而何哉昔尹吉甫作蒸民之詩以美仲山甫既備舉其德復備舉其職是即山甫之傳也然必歸之於天故曰保茲天子生仲山甫今考公之傳與山甫之德業不異則其生也何莫而非天乎公久勞於外雖暫居間而朝廷之上四海之遠無不仰公勲名望公復起入而保王躬補王闕以弘濟大業此固山甫永懷之心而亦公之志也故吉甫作誦以慰之予固非

吉甫比然知公永懷之心有素故題公傳後而亦以是慰之

跋錢宗嗣醫者滿腔生意畫冊

右畫一冊乃金太守伯玉及善繪者為名醫錢君宗嗣所作者也其畫有山水花卉禽鳥總題其端曰滿腔生意來徵余言予以謂生者天地之大德也人得是理以生所謂仁也仁者以天地萬物為一體民胞物與一視無間惻怛慈愛無不欲其同生並育於天地之間然欲

行吾之仁惟醫為然故醫之為術濟人利物起死回生
施其藥石之功躋之壽康之域其生意何如也宗嗣於
此觀其山水涵然而雲霞舒森然而林木茁無非生意
之流通觀於花卉禽鳥發榮之暢茂條達飛翔之悠然
自得無非生意之動盪即物理之生意有感乎滿腔之
仁心其生意之勃勃果孰能禦之哉是則繪者以是畫
為宗嗣贈乃所以為其仁心之助不特資其玩好而已
也

憂樂格言為夏都憲題

莫之為而為者天也莫之致而至者命也君子純乎天
理故能樂天知命雖處貧賤亦坦然蕩蕩無入而不自
得小人不知乎此所以雖處富貴而其心常戚戚歟古
之人至以萬乘之君不如陋巷之窶夫為言其垂訓也
至矣都憲天台夏君嘗得前人所書格言一方足以警
於其心也裝於卷端而求題其後君執法憲臺茂建功
業悠然東歸無所係累此其能樂天安命也可知矣宜

其珍重是書而不之棄也豈非知言者哉

策問

鄉試策二道

問禮教導民於將然刑罰禁民於已然者也是以古昔
帝王之治天下尚德緩刑率有導民之典以故教化興
行世臻熙皞在唐虞三代其載於經有可考見者歟肆
惟我太祖高皇帝條成大誥三編太宗文皇帝纂集為
善陰隲孝順事實宣宗章皇帝采輯五倫書列聖相承

前後一心無非勸善警惡導民歸於禮教而已其亦有
合於經歟三誥五倫其終始以何條善孝二書其終始
以何人歟五倫君臣之道則詳其目父道而下何為畧
之歟三誥三書其理亦有相通否歟諸士子服膺聖訓
有年其悉陳之毋泛毋隱

問洪範八政以食貨為首蓋食者民所急貨者民所資
而政莫先於養人故也方今上供京師之食率仰給東
南餽餉軍民相兼漕輓止藉一渠之達使渠水充滿則

舟行通利而粟可致矣設或水淺舟膠則有起撥之費
水溜舟覆則有償納之費及登岸抵京又有僦車之費
歲復一歲欲軍民無疲困也得乎稽諸古有請糴近粟
可省漕卒而後果便者有江淮之道各自置船而免傾
覆者有諸州回船給鹽以償其費者有引泉便漕舟通
而陸費省者可得聞其設施之方歟其法亦有可行於
今否歟方今通行四方之貨曰銀曰楮曰錢銀出山川
所產歲有常額市有定價惟錢楮出於國家鑄造使相

兼而行則利柄歸上而民亦便矣今則楮日加輕有停滯之弊錢日加重有盜鑄之弊銀日加散有消耗之弊日復一日欲國用臻富足也得乎稽諸古有言不惜銅愛工而盜鑄自息者有設質劑之法而民以為便者有出內帑收授而會子自重者有赴平準倒折而子母相權者可得聞其措置之術歟其法亦有可行於今否歟夫窮則變變則通通則久治法之所當然也伊欲水陸無虞費無浮浪而人力以甦輕重得宜物無翔貴而國

用充羨必有其道願酌古準今以對將采而獻之於上
對

味澹對

無欲丈人與味澹叟相遭於廣漠之野丈人曳杖逍遙
外物不撓而人世若超叟曰此有道之士也吾可與之
定交乃周旋追陪攜手同歸高坐劇談鉤玄索微言投
氣合泊然忘機丈人指其軒中之扁而問之曰人之吞
啗必待調齊入於唇吻然後可味至若澹者歆焉漱焉

若吸風飲泉雖已下嚙而莫辯其然叟之味之請聞所言叟曰走之願納交於丈人者實以為知我今顧塵問厥情曷左盍試為我陳之而走也敢先瑣瑣乎丈人曰口之所別其味有五曰酸曰辛曰鹹曰苦以至曰甘澹非其數生於五行洪範是譜鹹生於水苦生於火金木酸辛甘則生土薄乃爽神厚傷臟腑酸多敗脾辛多損肝鹹苦甘多心肺腎殘初雖不覺久而療難孰若此澹吾心所安不燥不濕匪熱匪寒惟茲是味他總不干誠

為滋益氣血之良劑保養壽齡之大丹意必有在於是也叟曰此所謂味五味之澹者也人具是形固當調攝保玉以全爾天年雖然似陟乎方外之習有我之私也走之志未止於斯

丈人曰君子於味所存以正所嗜以常常則可久正則允臧彼醯醢淋漓烹飪精鑿禁臠侯鯖山珍海錯雖可以塞爾饑腸充茲大嚼然致之匪易得之亦艱苟庖人之弗繼將必俯鉉朶頤顧鼎垂涎是以動色於炙染指

於龜寧知禍福於是糾纏孰若此澹味得天下之正而恒在日用之間至美不和純質以全一飽之外曷足以累吾之天叟之意其在是乎叟曰此所謂味飲食之澹者也孟子曰飲食之人則人賤之為其養小以失大也請言其大

丈人曰人之一心衆欲所攻物交於物乃引厥中是以耳悅淫哇目好冶容鼻臭蘭茝口嗜肥穠四體所務安佚是從驕奢宴樂耽毒厥躬彼其居列粉黛筵開綺羅

食前方丈笑擁笙歌醬酒藿肉封羔宰駝沉湎敗度其
存幾何出則鮮衣怒馬寶鞭玉勒牽黃臂蒼遺鈿墮烏
百萬呼盧千金結客嗜欲無厭終豈貞潔至有非分妄
求貪多務得富擬封君田連阡陌忘身殖貨珠貝駢集
高明之家鬼瞰其室孰若此澹有典有則音在黃鍾色
惟尚白環堵之宮聊以容膝韋布自煖藜糗可給掬月
吟風枕流漱石一榻之外舉為長物中有真味匪言能
悉若是何如叟曰此所謂味澹薄之澹者也武侯曰非

澹泊無以明志此亦儒者之素行耳願聞其它

丈人曰作德者逸作偽者勞順理優裕逆情鬱陶富貴在天窮達有命恬澹自守何事奔競爾其燭火乍舉羣蛾競集醯甕一開蠅蚋自溺走利絲毫奔祿寸尺是以銜玉求售投刺願識趙趙囁嚅患得患失囚首喪面奴顏婢膝吐露肺肝指誓天日初若可信久寧有實爾或美官是躋志盈計得聲勢誇詡驕蹇可挹恃其矯劇惘不忤其心迹其至位高則嫌勢均生敵疑軋懼逼承間

伺隙既擠於井復投以石此固世所常有與穿窬其奚擇孰若此澹無營無求與造物者游載沉載浮若不繫之舟隨寓而安萬慮以休樂天知命夫復何憂其味之雋永雖太羹玄酒而莫之與侔若是何如叟曰此所謂味恬靜之澹者也夫君子孰不欲仕又惡不由其道故孟子比之墻間之乞蓋甚之也然知命樂天非體道之君子不能走嘗從事於斯矣更聞與進

丈人曰邃古之初是曰大朴其民頡蒙其氣渾噩無思

無為不雕不斲觀其動止則茹毛衣草穴處巢居卧則
呿呿起則吁吁鼓腹而游含哺以嬉俗雖鄙野至德自
如觀其飲食則燔黍捭豚杯飲汙尊簣桴土鼓致敬鬼
神禮雖簡陋天真自存逮夫繩結既舒風氣漸闢人文
日宣寢勝厥質遂至瓊宮瑤臺棖題數尺籩豆簠簋錦
衣玉食物我相形利欲滋殖故智者擴擴而兼取愚者
株守而窘迫變詐旁午譎獮百出攘袂紛拏庶獄狼籍
試一味之舌本遭螫欲挽太古伊何能及孰若此澹天

君泰然身處今世心游古先衣茹雖非毛革而與葛天
無懷之民比肩居處雖非巢穴而與渾沌赫胥之子周
旋古澹是嗜世味徒妍彼夸毗之勞擾殆猶蟻蠆之過
前若是何如叟曰此所謂味古朴之澹者也夫唐虞三
代而上其天地日月即此天地日月也則知其人之心
獨非此心乎走誠願學焉丈人蓋先得我心之同然者
矣雖然尤欲聞其古味之實

丈人曰人匪生知孰容弗學具載方冊博文守約知其

味者貴乎能嗜嗜其味者貴乎能樂蹊徑一差大道叢
薄故四聖爰象帝王謨典詩之性情春秋褒貶樂則神
人以和禮則上下以辨洙泗問答濂洛講明大彌天地
炳若日星遠徵近取拳拳服膺施之于家則長幼序措
之于國則教化行布帛菽粟是為典刑彼莊老玄虛楊
朱仁義申韓刑名管晏功利蘇張縱橫范蔡辯議不韋
呂覽太公史記以至憤世嫉俗幽人狷士放言高論殆
千百計非不馳騁古今發揮理致豐縟美新駭聞驚睇

膾炙人口膏馥可味然以之輔世植教迪民成治致遠
恐泥其流也不能無弊孰若此澹在乎聖言揖堯舜於
寤寐接丘軻於几筵蔬食水飲簞瓢陋巷而得所樂之
自然飽經飫道含英咀華而忘魚兔之蹄筌若是何如
叟曰此所謂味理趣之澹者也得之矣然猶未也史談
曰儒者博而寡要勞而少功豈其然哉豈其然哉必有
至當歸一之論幸畢其說

丈人曰厥有一物生天地先張主人物萬化出焉代明

日月流峙山川飛潛蠕動發育兩間存乎吾心之中則純粹而混融虛明而宣通不偏不倚至正大公推乎其前而弗究厥始推乎其後而莫知厥終不以桀跖而有嗇不為堯舜而加豐但全之則為聖為賢失之則為狂為蒙是為古今之會事物之宗故舜禹之精一執中所以執乎此也湯武之建中建極所以建乎此也周公之思兼三王思乎此也孔子之一以貫之貫乎此也易書詩禮之所載載乎此也洙泗濂洛之所明明乎此也則

叟之所以味之者容非在於此乎於此玩味涵養本原刮垢磨光性真皎然存天理於流行之際遏人欲於未萌之先自强不息終日乾乾苟無二以無襍可希聖以希賢此冲澹之極致而莫有出乎其前者也以是聞於叟何如叟勃然改容避席跼蹐而言曰此所謂味天真之澹者也至矣盡矣其靡有加矣斯固走之所願聞也走端居守道存吾心養吾性以事乎天猶懼坐井而未有所明今得聞丈人啓蔽煥然若執熱而濯我以清冷

也謹再拜稽首以為終身味

上梁文

應天府學門上梁文

應天為京兆之大府儒學乃首善之名區枕秦淮而引
清溪風氣於茲而融結左鍾阜而右聚寶山形相向而
拱迎梵塔凌空卓東南之文筆江潮通海湧朝夕之詞
源是宜庠序之聿興雅稱衣冠之萃止前修侈靡古跡
留竒宋學士之聯句金春泉題玉兔吳皇象之斷碑鼎

峙號紀赤烏英俊來遊進其德而修其業師儒樂育誦
其詩而讀其書深究濂洛關閩之傳上溯禹湯文武之
道共沐菁莪之化雨皆成樸棧之良材濟濟多士之克
生落落名賢之迭出月宮攀桂雲路跨鰲魁京闈而冠
甲科文章追班楊董賈登臺省而榮斧袞政事邁韓范
富歐際文運之大亨仰先聖之遺澤惟是廟堂之空闊
夙恢門闕之崢嶸櫺星居朱鳥之中離火當文明之運
茲焉取象偉矣開祥奈何風雨之震凌遂致材木之摧

腐不有改作曷聳觀瞻茲者恭遇府尹魯公府丞白公
台郡儒宗昆陵宦族斯文山斗善類棟梁顧此一門之
當為欲圖千古之不朽撤其撓棟易以貞珉府推王公
既協謀經始於其前府判宋公復互力贊成於其後掌
教耆碩克符厥志分訓諸彥各罄乃心士希賢賢希聖
聖希天子何人也窮則變變則通通則久吾豈飽哉相
與效修泮之魯侯不惜召剖璞之荆卞乃感地不愛寶
嶽則效靈琬琰出乎崑岡瓊瑤臻乎泮水斷來山骨全

無斧鑿留形移至雲根猶帶峯巒餘潤斷鰲足以立四
極巍然數仞之高表杏壇而啓重扉浩若千金之費崇
素王之廟貌飾夫子之宮墻雲漢昭回上擎天而下鎮
地樞軸旋轉闢則乾而闔則坤壁立閑吾道之大防矧
峙障廻瀾之砥柱精黷改色逢掖增輝從古所無迄今
始見任使風吹日炙管教地久天長十年百年千萬年
垂衍無窮大書特書不一書揄揚罔既念我昔為游歌
之所可於侯無贊頌之詞請激昂工匠之歌聽敷唱兒

郎之偉

梁之東泮池春水禹門通好待一聲雷奮蟄錦鱗箇箇
化蒼龍

梁之西雲路攀蟾信有梯禮樂丹墀期射策胸中文氣
吐虹霓

梁之南四書六籍貴沉酣占却鰲頭春宴處恩波新賜
淺拖藍

梁之北燦燦三台星拱極人才培養賴賢侯要使公卿

從此出

梁之上門闕重輝新氣象於昭默佑在天靈此去俱堪登輔相

梁之下絃誦洋洋宣教化席珍待聘應時需美玉良金無定價

伏願上梁之後學顏志尹家稷人舉歲拔真才接武賓興之選朝多名宦比肩進士之科鳳凰臺來今日之鳳凰龍虎榜集盛時之龍虎蘊明體適用之學輔弼朝廷

收致君澤民之功翊扶社稷儒風丕振聖道益尊

倪文僖集卷二十五

欽定四庫全書

倪文僖集卷二十六

明 倪謙 撰

神道碑

明故奉天朔衛宣力武臣特進榮祿大夫柱國武
強伯楊公神道碑

昔我太宗皇帝慮北邊遺患頻歲親征朔野清肅宣宗
皇帝亦嘗北伐殲夷殆盡自是息兵思得熊羆之士不

二心之臣固守要害保乂王家時則有若潁國武襄公
洪勇略不世出朝廷乃拜為遊擊將軍禦邊獨石尋佩
鎮朔大將軍印鎮宣府公凡出兵必與其猶子武強伯
能彰武伯信偕戰輒有功用致羣醜竄伏威震中外天
下稱邊將之武者必歸楊氏後洪卒能佩鎮朔將軍印
鎮宣府信佩征西前將軍印鎮大同東西掎角保障邊
陲深為國家所倚賴天順庚辰閏十一月朔能亦卒年
五十有二訃聞上震悼為輟視朝遣禮官諭祭致厚賻

命冬官營宅兆其弟倫扶柩歸京師以是年十二月某
日葬阜城門外釣魚臺原謙嘗為誌納諸壙矣倫茲伐
石樹碑墓道復欲謙為之銘謙荷公愛厚無可酬德不
朽之圖其奚敢辭謹按狀公字文敬姓楊氏能其諱系
出太原霍山王宋有諱輈者官楊之六合因家焉曾祖
諱政陝西漢中衛百戶祖諱璟嗣皆以潁國貴贈柱國
昌平侯父諱琳以公貴封榮祿大夫後軍都督府同知
季父忠以彰武貴封驃騎將軍後軍都督府僉事初潁

國嗣父職調開平二弟與俱自陝來宣寓居城南而公
生公幼莊重異常兒從耆儒魏裡宗講學習孫吳兵法
膂力善射宣德中嘗還漢中展墓督府稱其孝潁國欲
王其成貲遣使遊公乃之齊魯吳楚之墟親賢取友智
充識博比還潁國益奇之正統甲子春從潁國出戰以
克列蘇敵棄輜重走擒獲塔喇海等二十餘人以功陞
開平衛所鎮撫有族姪開平指揮使宗幼疾不任事潁
國欲易以公疏聞詔許更代於是公任指揮使宗任所

鎮撫戊辰冬與敵戰灤河三岔口敗之擒獲奇徹赫等已
巳春擢都指揮僉事秋從潁國與敵戰大同聚落店追至
拷佬山敗之擒獲珠卜丹等奪回所掠人畜尋從左叅
將都督朱公謙與敵戰懷安城東敗之擒獲蒙克都勒幹特
穆爾親解詣京上嘉其功賜以金幣冬從潁國還朝有
金幣之賜時敵擾邊地詔公追勦遇敵紫荆倒馬二關
連戰敗之擒獲伊奇喇斯等奪回所掠人畜景泰初元春
擢都指揮同知賜以金幣尋拜遊擊將軍禦邊宣府錫

以戎具金幣甚厚夏戰敵八里溝及荊子村敗之擒獲
省洪大使等秋還朝擢都指揮使冬詔仍充遊擊將軍
統神機京兵辛未春丁母夫人陳氏憂尋擢後軍都督
僉事充左叅將鎮宣府夏進都督同知尋充左副總兵
錫以誥命甲戌春召還總神機京兵天順改元春以迎
復功擢左都督賜以金幣尋命總兵宣府賜以金幣夏
大同有警詔裨將往彼會兵禦之公奮然請自行戰敵
磨兒山及石灰站敗之擒獲綽和爾等奪回所掠畜衆

秋進爵武強伯食祿一千石乃上疏欲乘敵弊舉兵殄
之上不許賜勅獎其忠勇戊寅春賜以誥券加封奉天
翊衛宣力武臣階特進榮祿大夫勲柱國制辭有剛毅
忠良驅敵振軍之褒秋諾延來款塞言敵且入寇公欲
以狄攻狄給以礮火諭使夜斫其營果大敗之俘獻所
獲於朝上善其策夏敵擾大同復請進討敵聞公至悉
驚遁秋戰敵新河口敗之擒獲努色爾尋往獨石戰敵
非菜衝追至保昌州敵勢窮蹙悉棄輜重遁詔發兵策

應大同敵聞公至退去乃還兵保境敵聞公還復入公復馳往敵又退乃耀兵境上駐逾月敵竟不敢復入而還初公師行中夜有星如盂墜城中光燭地如晝衆咸為公憂師還未幾公果卒卒之旦猶力疾坐廳事籌邊日是而逝言不及家事公沉毅警敏善用兵號令嚴明秋毫無犯有食民一瓜者輒寘以法駐營則寂若無人欲養馬力常與士卒同步寒則給以衣裘病則給以肉糜遣醫調視死則給槨祭葬之用能得士死力所至成

功止兵驚憚至以楊爺呼之處事詳慎嘗墾隙地鬻蔬
粟以供公費盡革軍衛科擾弊築室數百區以居河南
戍兵省其僦屋資順聖川牧地建議興築二大城措畫
有方工不逾月奏免徵償軍士物故馬疋人德其惠律
身廉介燭理明析剖決愬訟深中下情重文教朔望則
詣廟學謁拜督厲生徒性至孝侍膳問安不離親側敦
睦宗姻不遺故舊傾身下士忘其勢分故卒之日宣城
為之罷市遠近號痛如失父母雖女婦童穉亦皆哀感

非公恩德曷以致茲雖古名將不是過也夫人蔣氏卒
先公八年繼王氏子一人祿早夭女二人贅龍門所千
戶弟王英嫁龍門衛指揮使張祥公無嗣以倫襲羽林
右衛指揮使銘曰

陰山燎揚久未撲鍾毒蓄謀繁種落弱則款附強弗若
潛伺卞集肆兇虐我皇赫怒整於鑠稱戈立矛靖絕幕
爪牙有將雄膽畧奕世號武秉忠恪委以北門司鎖鑰
授鉞擁纛鎮雲朔乘障以待騎且曠有或嬰之疾擊斮

累累勁敵俯就縛生俘死馘氣沮索子遺餘孽遁遐邈
邊烽息燧靜鳴柝威行塞外疆圉拓民安國奠境清廓
章德昭勲儋顯爵鐵券金章誓河嶽長城萬里副攸託
憂抒北顧心孔樂今無與儷古可角凌烟宜並褒與鄂
營頭星墮光明爍乘雲上征返冥漠訃聞當宁色驚愕
悼惜褒卹恩典渥螭螭龜負石堅確載德墓門婉筆弱
吁嗟九京不可作千秋應有來歸鶴

故定西侯蔣公墓碑銘

公諱義字惟忠姓蔣氏揚之江都人高祖諱三公曾祖諱
八公祖諱從龍皆贈定西侯父諱貴封奉天翊衛推誠
宣力武臣特進榮祿大夫柱國定西侯食祿二千石追
封涇國公謚武勇母李氏封夫人公生而穎敏自幼言
動不凡僮儻好學讀書過目輒成誦克通大義尤厭飫
左氏春秋有會心者相與究遺經之奧論古今之變雖
對談竟日未嘗有倦色聞其言者皆心融而意愜也性
剛毅人有忿爭不能平者率曰公正人也盍往質之公

為據理折其是非咸悅服解去無有後言平居恭慎自
將嚴若不可犯及至接人則謙和樂易畧無貴游習好
為歌詩有思致篤於教子俾從明師講藝周人之急義
所當予捐百金不吝苟非義雖一毫莫得也故友金姓
者父喪不能舉公憐之為市棺資以金帛有趙姓者貸
公金三斤久弗能償或曰必致於理始可得公嘆曰始
吾濟其急今虐之仁者固如是乎即焚其券言者大慚
人以是益高公之德量其行多類此正統己巳武勇公

為冢嗣當襲爵以足疾辭進子琬襲焉越三年賜誥封公為定西侯天順改元春公有疾時上命琬祀神武當瀕行諭琬曰吾父起戎行積勲伐以遺我後人汝膺重爵宜朝夕策厲思繩祖武報國恩以忠臣良將自期吾死瞑目矣脫有不諱汝其識之比琬還而公已卒是年六月二十九日也春秋四十有四娶王氏封夫人有懿行子男五長璟蚤卒次即琬學博而行篤克世其家琬瑾瑜皆幼女四武強伯楊能永康侯冢子徐昌東勝衛

指揮使張璵會昌侯冢子孫璉其壻也孫女四嗚呼國
家之興天必生雄武不常之材以佐成鴻業慶流子孫
與國匹休非偶然也武勇公早從義旗征交趾靖沙漠
鎮松潘平麓川經營四方兵罔弗克豐功偉烈冠于當
時著于信史公席遺麻蘊才德正當大究厥施如李西
平父子續令聞而亢厥宗乃以疾廢甫荷侯封而又遽
止於斯也惜哉武勇公制葬於榆河鄉義井里之原公
之卒上遣官諭祭命工部營葬事以卒之年八月十九

日祔于墓琬懼潛德未彰乃奉文學金君銳所述事狀
請予銘其墓碑孝子之志也銘曰

猗嗟蔣公涇國世勲盟重帶礪有赫前聞公宜紹休為
國方召千里龍媒淹于櫪阜天病厥形弗病厥德既武
既文動合矩則澹若儒素左圖右書忠信為佩仁義為
輿繼志象賢是曰克子蘭茁其芽復濟世美爰繩祖武
屬之聞孫公拜列侯推封寵恩赤芾葱珩煌煌命服下
壽未躋溘焉不祿玉璫黃流必以類應祿壽是膺盛德

斯稱為善者懼謂理莫徵天乎孰知壽之以名帝聞曰
咨汝予世胄祔其先人官為營甃甃墓門我銘其石
賢者之藏過車宜式

登仕佐郎應天府陰陽學正術薛公墓碑銘

公諱富字仲德姓薛氏京口人高祖某仕元為萬戶父
士明母羿氏公幼聰敏志學博通載籍尤精星厯易數
之學洪武丙寅以明陰陽徵至京因家江左永樂初應
天府復設陰陽學府丞王公諒薦公堪任學事詔授正

術公在官恪勤厥職寅畏小心候時諏日固有差忒公
學務簡府長吏知公廉濟事輒屬公裨贊為多公存心
忠厚導人為善有不善務為掩覆人稱其長者句容縣
令受民囑隱開河事覺上命覈實府以屬公公勘他所
以復令得釋上將北巡糧運甚急府推俞某恇怯不能
督轉屬公公直抵江北給饋不乏府尹向公瑤深器重
之被薦預修永樂大典校正範圍術數皆精確諸司
盜課鈔事覺朝廷命追償闔府官無得免者獨公不預

嘗署經歷司事屬徵丁鹽鈔萬計假貯江寧邑廳代者
至公慮有失儉民庫貯之甫移去邑夜火焚罄鈔得無
恙若有神預告之者咸歎公為盛德所致內局織工製
造鹽惡屬公追償公不忍加刑衆工相戒曰勿宜累長
者悉輸完其仁恕率類此以老謝事蒙賜勅命進階登
仕佐郎正統己未十二月七日以疾卒享年八十有二
生元至正戊戌六月四日公為人謙和樂易言行端慎
溫然君子也人皆樂親之居家孝友弟道玄早卒拊其

孤璘同己生蒞官清介一毫不妄取於人故卒之日家
無餘財配蔣氏有淑德有子曰玉璘琦瑜玉欽天監主簿
瑜嗣應天陰陽正術有孫曰謙誠誼讓諫謹詳謙天文
生讓亦嗣正術墓在江寧安德鄉岡墓村原葬幾二十
年矣而墓石尚未刻璘深懼潛德泯沒而昆季又相繼
謝事苟不及今為之將有無窮之憾乃述履歷之槩偕
諸子來乞銘可謂篤追遠之孝者矣嗚呼人道無親常
與善人若公者非所謂善人乎故身被榮名壽考以歿

而子嗣之子歿孫復嗣之簪纓相襲者三世後未可量也天之所與蓋於是而可徵矣銘曰

降衷自天兮公乎惟克全兮履道於平平兮專門之學為世用啓厥先兮以似以續流遺澤其永延兮彼君子兮茲其阡兮

明故中奉大夫山西布政使司右布政使謝公神道碑銘

公諱佑字廷佐姓謝氏世居安慶桐城之清淨鄉

曾祖惠一號添錫祖住慶值元季世亂有乘時入鄉劫掠殺人者公從容諭止解其所縛而縱之賴全者衆世稱其有陰德逮入聖朝天下平定即鄉之朱清渡葺舊廬以居樂善好施鄉人號為心善先生父永富母王遘疾刲股和粥愈之人謂之孝子妣錢氏有懿德生二子長俛次即公也公天姿雋爽幼有巨志父早卒家貧賤躬紡織以拊之嘗牧牛田野間每袖書於牛背上讀人咸異

之甫成童縣尹欲舉民秀增廣學校生員時贈知州章公某封員外郎黃公子清俱為庠生共舉公族長之子以充族長度子弗堪集族子弟問孰願為皆默然公獨應曰吾願往母惜之為泣下公慰母曰兒得為秀才不愈於牧牛乎遂補庠生寓員外公所拜為師員外公教之習字肄業公遽知用功日進一日竊朱書欲求生富貴須下死工夫十字於几員外公忽見陽斥而陰重之教諭冷公暄初至選公聰敏者數輩注意訓迪日授書

數千言公讀不過二三十遍輒能背誦冷公深期待之
諸生遇假日多事佚遊公獨理課業於史志諸書無不
博覽工詩賦及駢儷之文不泛交際遇益友必執贄以
求講訂知州公愛如己子供其所費不靳習詩經患無
師傳賴南昌朱孔脩先生引拜吉水尹司正先生得經
義百餘篇以為式自是融化成文越三載經書豁然通
貫宣德乙卯遂領京闈鄉薦正統丙辰登進士第觀政
刑部邑自國朝開科以來無登進士者登進士者自公

始舉邑咸歎慕之丁巳授本部陝西司主事獄獄公恕
己未秋以疾辭歸辛酉疾愈赴京壬戌春調戶部四川
司主事蒞政有能聲命賫官銀萬鎰赴遼東糴糧以實
邊庾陞署本部廣西司員外郎景泰改元賜勅褒美贈
考如公官妣封太安人妻封安人迎太安人就養官舍
己巳秋北騎入寇以公有風力改監察御史奉勅出鎮
大名練兵保境以為京師聲援公至修城垣造器械拊
流移訓士卒號令嚴明百度振舉軍民帖然事定還朝

陞署本司郎中復奉勅往督山西邊儲接濟大同宣府
事還與實授未幾陞廣東布政使司右叅政天順改元
復賜勅褒美加封贈其父母如制追念先德求前禮部
侍郎羊城陳公璉為文表諸墓尋陞河南左叅政戊寅
陞山西右布政使公蒞官慎勤存心仁厚凡所設施務
使民沾實惠前後志操始終一致兩主提調科場士類
悅其公道成化丙戌年方五十有六苦風疾具疏懇乞
致仕歸家杜門養和不干世務奉觴壽母樂其天倫為

人器宇軒豁脫畧羈馭絕無町畦發言談笑一座盡傾
好評論人物窮其底裏人多服其至當作文雅淡詩有
唐人風致書簡得歐蘇體有宦遊稿藏於家晚於祖基
作室為佚老所鑿池養魚開圃蒔蔬周垣植以嘉樹客
至則開宴堂中觴詠為歡或散步園池以為適己丑太
恭人以壽終公哀毀喪葬一依文公家禮不用釋老二
教鄉人化之庚寅春至邑中訪故舊首謁文廟次造員
外知州二公家分惠俸金以酬舊德越數日還鄉而風

疾復作矣以四月十六日終于正寢享年六十其生為
永樂辛卯十月十五日配朱恭人性貞淑婦道母儀為
閨門式先公十五年卒側室丁氏亦先卒子男二長瓚
娶太守章公女卒次瑾娶監察御史方公妹謹厚克承
其家皆朱出女三一朱出二丁出適周道吳希道章顯
皆宦族孫男一孟祥孫女三瑾已卜卒之月二十六日
葬公於祖塋馬公觜之原茲來京師奉太守公所述行
實請予為銘將勒石樹於神道太守與公自幼連硯席

同寢榻講學幾十載先後俱登進士第又為姻家厚善
親愛莫加焉則所述信而有徵可知矣遂取而次第之
而繫以銘銘曰

精金在鑛良玉在璞煥乎成文必假追琢公負異質如
玉如金刻志力學允為國琛間氣所鍾超出凡伍維嶽
降靈生茲申甫策名甲第獨步無前歷職郎署聲績卓
然經國保民才兼文武擢長雄藩累承褒調位居方伯
為古諸侯吏畏民愛德孚惠周入為輔臣縉紳望屬以

疾引年克知止足優游林壑遂其高情千載疏傳接武
令名甲子數窮公亦永邁甘棠之思廣存遺愛勒銘神
道式著徽猷青史有錄茲焉是求

墓表

明故懷遠將軍指揮同知李公墓表

皇上嗣登宸極改元景泰薄海內外誕布維新之命謙
奉詔使朝鮮道次遼陽塔山時北兵潛寇境上守禦塔
山定遠衛指揮同知李榮率兵追勦敵悉遁去謙見其

威武心甚偉之比使還榮泣告曰不肖先考懷遠府君
齒未半百輒已不祿卜葬塔山之西痛惟潛德弗彰恐
遂湮泯先生職文翰章畀一言以表諸墓道再拜以請
謙嘗偉其人世德之美可徵矣奚容辭按懷遠公諱旺
姓李氏古邳石蘭社人也曾祖諱五祖諱九世父諱駒
俱贈懷遠將軍指揮同知父諱紹興世父勲績從太宗
文皇帝舉兵靖難懋立戰功累陞應天衛指揮同知公
襲厥職沉毅有勇畧凡遇敵必先登陷陳無所怵怯永

樂間數征迤北公輒與焉宣德戊申調興中征哨擒獲
敵兵牛馬人口朝廷嘉之賚以白金楮幣布帛庚戌調
寧遠衛守禦中左千戶所勦建城郭經度規畫不憚劬
勩卒底成功善拊士卒皆結以恩信及今人思悼之正
統十三年九月六日以疾歿于正寢春秋四十有五配
董氏劉氏子男二人長即榮次顯女二人妙能妙連董
所出也女一人妙明適百戶蘇友嫡嗣全劉所出也嗚
呼國家蓄罷虎之士列在疆圉所以保邊防而遏寇暴

也公材識超邁果敢有為能使敵畏其威士懷其惠其
賢於長城也遠矣天誠假之以年其屹立東藩折衝萬
里足副所託曷為奪之速耶然有子克踵遺蹟勇烈綽
有父風豈惟保厥餘庥爵秩之崇將日進而未已也可
卜矣為子孫者尚益紹隆於弗替哉是為表

明故贈金吾將軍錦衣衛都指揮使李公同室太
夫人郭氏墓表

公諱觀音保姓李氏其先西域人也曾祖穆爾古祖家

古魯在勝國時任西寧州同知遂家西寧父都爾蘇母
吳氏都爾蘇有弟二人曰納木喀嘉勒槃當元季兵亂邊疆
多事納木喀移家陝西之華陰居焉洪武初舉族同弟珠
魯歸附國家太祖高皇帝嘉之授納木喀鎮撫職俾鎮西
寧納木喀歿子英嗣提土兵累征迤北達寇茂建勛績朝
廷與之分土錫爵會寧伯仍鎮西寧公沉毅有謀雖不
事事凡軍旅之務英必咨問於公公與之商畫皆懸中
事機故英所至克捷為時虎臣公之力居多焉公性質

直與人交開心見誠無所隱伏遇事有違理者必面斥
之不少貸故人皆親愛而敬服之公次子文方數歲疑
然如成人公嘗指謂其母曰是兒骨氣英英非凡材也
大吾家者其在是乎可善教之恨吾不及見也蓋春秋
四十有三而卒時永樂丙申某月日也子四人長玉早
喪次即文次通次贊孫男十人鐸鏞鉉釗銓鑄鋼銘銀
鑑孫女六人指揮使魯鑑祈瑛陳雲其壻也餘未行太
夫人郭氏西寧人也自幼端靜柔惠為父母所鍾愛及

并歸公逮事舅姑早暮恪勤孝養婦道克脩主中饋相
祀事皆身執其事不以假人綜理內政秩有倫緒待嫺
戚御婢僕曲周恩意及公謝世即屏膏沐誓守厥志拊
訓諸子恒以繼紹家聲不墜先業為勉諸子遵承慈訓
無日敢怠而文薈力善騎射尤好書史叔父會寧俾侍
左右以備任使洪熙改元隨會寧征勦黃達實有功宣
德改元進貢來朝入見宣廟奏對稱旨明年特授西寧
衛指揮僉事四年會寧召還擢文陝西行都司都指揮

僉事代之鎮守尋召還擢都指揮同知俾隸錦衣衛北
征有功擢都指揮使賜之誥命推封其三代故公贈金
吾將軍錦衣衛都指揮使郭封太夫人文之配張氏封
夫人寵眷優渥時人榮之景泰甲戌正月十三日太夫
人以疾卒春秋八十有一文銜哀具疏以聞詔許歸葬乃
匍匐歸以某年月日葬之西寧城北八里車卜魯川之
原既葬還朝天順改元春以翊戴功累擢前府右都督
佩征西將軍印鎮守大同懼潛德弗彰乞予為文以表

諸墓嗚呼國家并包總攬惟賢才是用忠勤能效而爵
賞隨之李氏族著西疆世篤忠款用致析圭珥貂爵崇
五等績亦偉矣公上承世澤克加培植而不食其報以
歿然慶鍾厥子龍章褒贈賁于身歿而郭亦已親享其
榮則亦何憾之有哉矧為之子者材武出倫方隆柄用
功業之建日進未已則其所以榮親者又寧止於是耶
故為表之以俟

明故奉議大夫周府長史張公墓表

洪武丁卯二月十五日周府長史張公以疾卒于官歸
葬邑之三溪地邨山之原越七十一年為天順戊寅其
孫端被薦來京始克奉狀謁予文以表諸墓按公諱鳳
字景翔號白羽生其先光州固始人後唐間有為太師
梁國公者隨王氏入閩後有為將樂簿者因家焉故今
為將樂人曾祖諱日宣祖諱德昭宋朝奉郎父諱本元
元統癸酉進士仕至福建儒學提舉母蕭氏提舉少從
外祖宋進士廖公遊廖公之學私淑龜山之傳授受有

自故公所得本於家庭明易書詩三經子史諸書靡不通貫元末盜攘行省署公為本縣尉公防禦有方盜不敢犯國朝天下甫定開設學校公以經明行脩首被薦為本府儒學訓導公以師道自任勤於啓迪凡經其陶鑄者咸克成材時延平有濠梁唐公鐸廬陵胡公子祺相繼為守二公皆賢牧皆禮貌公子祺至為公立傳托爾和為兵部尚書薦公孝行適諸王初封就國選賢為輔遂擢周府長史公在藩八年開導匡翼無所違失每

以春秋進講發明尊王賤伯內夏外裔之旨甚悉王輒稱善深加敬待蓋春秋四十有八而卒配汪氏先公十年卒生男一曰基女二適李宗亮吳恭繼楊氏後公五年卒生男一曰某女一適湯某孫男一即端也公儀觀秀偉性資和厚篤於孝友事親克致色養撫兄遺孤不異已出應物一以至誠臨事務存大體嗚呼士君子克積學飭行以足於已則隨所用而無不有以自立觀公為尉為師為傅咸卓然有立如此不由其學行之足乎

已歟惜不及下壽而賁志以歿此其為可慨也今有令
孫將由薦達進有祿位則餘澤之承有不在茲乎遂為
之表

明故昭勇將軍萬全都指揮使司都指揮僉事致
仕李公墓表

孔子謂文莫吾猶人也躬行君子則吾未之有得孔子
豈未得於躬行哉蓋以誨人不可事虛文當務實行也
去古既遠世降俗漓若漢萬石君陳太丘淳謹長厚化

行家邦為世欽仰豈非所謂躬行之君子哉余至宣府
聞致仕都指揮李公敦德服義子孫秉禮能循古道雖
名武弁儒紳猶或難之茲非萬石太丘之倫歟而今則
已矣惜哉公諱徽字子素姓李氏鳳陽臨淮人祖諱濟
元行樞密院判元季世變鳩兵保境天兵臨濠梁率所
部歸款從太傅徐公取蘇州授廣信衛鎮撫洪武初征
閩建寧將樂松溪克之改正千戶調守階州贈明威將
軍指揮僉事祖妣陸贈恭人考諱庸嗣授秦州衛正千

戶討平陽河州迤西巴撒川及七倫族諸番寇擢指揮
僉事尋擢陝西都指揮僉事妣時封淑人兄諱循嗣授
平涼衛指揮僉事謫交南攻破吉利冊安老慈麻太原
蠻寨復職歿于化州無子永樂丙申公嗣之改宣府前
衛甲辰扈蹕北征宣德戊申從陽武侯薛公戰敵古北
口敗之俘獲人畜什器甚衆有白金文綺木綿楮幣之
賜庚戌敵寇青邊口追擊敗之奪還被掠人畜尋奉勅
哨備開平明年命領神機兵巡邊乙卯詔守青邊口數

年敵不敢犯正統丁巳上命大司寇魏公出視邊政薦
公才堪任劇進署都指揮僉事掌萬全都司印政修事
舉戊午綜理兵屯勸課有方時朝廷發京儲實邊命鎮
遠侯顧公督運自居庸抵大同每三十里為堡士卒接
遞鎮遠舉公董役公病推輓勞困米積不前建議糧在
道者皆隨處收貯為便疏聞上從之人賴甦息鎮遠嘉
其材識解腰帶以贈癸亥詔守柴溝堡明年從叅將楊
公戰敵伊克穆蘇敗之獲其人畜什器實授昭勇將軍

都指揮僉事己巳年五十八即上章謝事以子綏代之
君子賢其能知止足也門居十年以天順己卯正月十
一日告終于家年六十八遺言勿作佛事生於洪武壬
申六月一日公樂易寬仁沉毅有謀其北征也糧竭士
饑比餽餉至驟得飽食多脹懣死公集米帳下節約分
給所部不死一人百戶韓榮拾遺甲部卒誣以盜上怒
將斬之公為訴其情於安遠侯柳公轉聞于上得貰死
榮德公再生朔望輒焚香向公所拜禱之其戰伊克穆

蘇一卒失馬危甚公呼載馬後從者因脫馱馬乘之得
出後卒偕父詣公泣謝公不以為德也每出兵必囊藥
以療病卒多所全活公既謝事適敵大舉入寇守將統
兵出戰獨都憲羅公城守督令嚴急柝聲不絕公謂宜
靜防之都憲用其策城守無虞敵既退我軍多遺神鎗
銃礮於戰所公謂宜收取以備軍實至今沿邊得資其
用公之力也嘗有客寓粟數百斛於公家值雨濕浥公
為密補所損不使客知天性孝友父早喪事母務得歡

心湯藥必親嘗時新異品必奉母而後食必咨而後行
母歿哀毀與弟行恩誼采篤行卒語及輒悲慟樂施予
姻黨婚喪有不能舉者出貲周濟喜書畫遇善本捐金
購之好延納賓客親賢善交晏憲僉彥文瞿長史宗吉
謫寓於斯公皆執弟子禮從之講學故公行業過人遠
甚每從大將出師必延公至帳與叅籌畫退而未嘗語
人迹其德善可謂無媿於躬行君子矣配董氏封淑人
前指揮某之女懿行純備子六長即紱宣府前衛指揮

僉事以戰功陞指揮同知階懷遠將軍次縉紳續純經
縉卒經習舉子業女四嫁指揮周賢楊琳楊俊一未行
孫男女四紱以公卒之年二月七日葬于宣城東馬頭
山祖塋而墓上之石未有文以刻乃奉鄉貢進士林孟
暘所述事狀請予為表其幽潛嗚呼德厚者流光德薄
者流卑故視其子孫之興替可以占其世澤之厚薄今
紱昆季質愿雅淳飭德厲行不惟強於武事而又力乎
儒業非公厚德之所敷遺能致然耶則夫聯珪襲組以

光大其宗可識矣是用原其德而為之表

明故萬全都司都指揮同知文公墓表

公諱弘廣字同仁廬之合肥人也祖考諱道國初從龍而起累立武功積官永平衛指揮同知考諱郁改富峪衛基德流澤日厚日壤鍾慶於公魁梧剛勁閑武畧善騎射性資軒豁落落有奇節洪武戊寅嗣官改興州中屯衛再遷密雲及廣寧二衛所至不久皆有成績著能稱永樂庚寅扈蹕北征勞績居多賜文綺二表裏楮幣

美

從正統丙辰朝廷以其久勞使事威望著於遠裔賜勅
俾統精兵三千分守柴溝堡地當北騎出沒要衝公練
兵息馬多設方畧以謹備之敵不敢犯屹為宣城保障
十一月擢萬全都司都指揮僉事辛酉聞敵近塞公統
精兵出境遇敵戰閔安山俘獲達兵托和齊等獻于朝
擢都指揮同知賜白金五兩文綺二表裏壬戌嬰疾不
起公有家在宣或勸之還家療理者公曰我受命守邊
死于此分也胡可為自便計耶家人不從強舁以還逾

二日竟卒實是年十二月二十七日也春秋五十有七
生於洪武丙寅九月二十日配李氏婦道母儀著于閭
閻天順壬午某月某日卒次配吳氏馬氏方氏方亦卒
子三人長曰瑄嗣官宣府前衛指揮使歷樹戰功陞萬
全都司都指揮僉事分守柴溝堡克踐先烈次曰珍曰
珪女二都指揮陶忠孟壘其壻也孫男三人錦錡鎮孫
女一人公生於世祿之家而能秉禮好義端方不阿事
親孝處弟曰昌通達克篤友愛撫羣從曰瑀璇璣不異

所生家庭雍睦馭士卒結以恩信盡瘁王事未嘗退憚
惜乎用之未竟而年之不假也悲夫以卒之明年正月
二十六日葬公于城東不食之原而墓上之石久無文
以刻瑄懼潛德弗彰奉事狀再拜以請乃為撫實而表
其墓曰自古明臣良將際國家亨嘉之運以出布德宣
威攘遏奸宄以佐成一代盛治績著當時慶流後裔何
其偉也公雄傑武勇負材不羈受知朝廷委以邊寄用
能懾服邊庭懷柔絕域功崇業懋身荷寵榮視古人何

多讓哉昔博望通道西域漢德昭宣於遠李牧坐鎮北
庭邊馬不敢南牧若公者可謂兼之矣嗚呼是為表

故中書舍人曹廷端墓表

廷端諱冕號可齋姓曹氏廷端其字也其先由汴中徙
濠梁宋南渡遷句曲族蕃盛因名其地曰曹庄有諱萬
四公者始遷茅山之百社村生三子分東屋西屋中屋
三派廷端東屋派也曾祖伯達祖道銘俱贈吏部尚書
父義南京吏部尚書致仕母某氏封淑人廷端姿表明

秀如玉雪可念風猷醞藉自幼端重無童習見先生長者於道執禮甚恭咸器重之性閎敏夙承家教篤志問學尚書公欲博其材遣從祝給事中顥授進士業沈郎中為忠習書不鄙從予攻詩皆有造詣又遣通外國文字能精譯其義著為文辭則舂容一本諸理不戾於槩發詩歌則清逸有巧思粹然成音字畫則端勁道美甫弱冠老成者多自以為弗及也挾所得將奮身科第適朝廷選能書者給事館閣廷端在選中年雖少被服素

潔絕無貴游氣在公恪勤迺事無怠退則延名士講學
賢聲藉甚未幾擢鴻臚屬秩滿進中書舍人入直文淵
閣恭巽和厚舉止閑雅出入有常度不愆於儀諸閣老
先生深相敬愛禮待有加凡朝廷高文大冊內外制誥
四裔君長詔諭多其手筆潤飾綸綍朝臣荷誥勅推恩
其親者得廷端書輒喜幸以為榮居清資幾二十年士
譽翕然歸之尚書公以疾卒于家訃至廷端號慟幾絕
遽奔喪歸體素癯弱遂積哀成疾不起年甫四十天順

八年正月初三日也距生洪熙元年正月十五日廷端
性孝友事尚書公盡色養客至承順左右共子職無惰
容處朋友克全交好不以始終有間賙人匱乏傾貲不
吝有在患難中者雖遠方必緘金附寄以濟慰之其好
義如此不善飲而樂款客至必觴酌盡驩論議古人賡
酬篇什情興藹然士大夫樂從之遊若聶文學大年詩
名重當世亦折輩行與為友更唱迭和葩藻疊出動連
百數十篇不止四方賞卷軸求其作者充積几案森如

東筍家多藏古圖畫朝退宴坐一室時取而展玩之以
自適或焚香瀹茗鼓琴一再行或散步庭除觀花卉生
意或倚闌默坐延清風而待明月高懷雅趣超塵絕俗
不知軒組為何物也故廷端之卒人皆惜其氣稟過情
故造物靳其壽歟所著有可齋集若干卷藏于家庭端
元娶李氏董氏俱卒繼陳氏無子以弟之子某為後以
是年月日祔葬某原祖塋其從兄上舍廷明介朱侍御
良玉奉童內翰大章所為事狀請予表其懸綽之石予

於廷端辱有一日之長義不可辭乃為論次如右而復
為之言曰長山邃谷必產良木名宗世閥必生英材嗚
呼若吾廷端其可復得也耶尚書公有豐其殖載德委
祉固應發於廷端也而仕不厚祿廷端殖學提身立志
遠大固應致於耆艾也而年不中壽抑命矣夫抑命矣
夫然其材名德業表表著聞文獻相承克濟世美異於
弗堂弗構者萬萬嗚呼廷端此其為足以不朽矣源深
者流必長獲而食之不逮於今有不在於後乎是用焯

其遺芳揭諸墓道尚有考於來者

故監察御史張先生墓表

承翰張先生有用世之雄才而弗究厥施以歿此世之人所以共惜之也惜其人則必求其志節之懿而表著之斯不徒惜矣先生諱金陵姓張氏字承翰以字行世居吉水文昌鄉西園生而氣質警敏不凡九歲就學讀書過目成誦作詩對輒有奇句攻舉子業師逸功倍先生長者皆器異之比長長身美髯丰度英爽音如洪鐘

言動磊落頎然偉丈夫也宣德壬子中順天府鄉試明年中會試乙榜當外補召試內庭與梁燾等十數人同被選留俾冠帶進學成均蓋養成其材將大用之也凡遇瑞應慶賀必製詩賦以進輒蒙賜賚正統改元仍中會試乙榜以母老就職得授應天府學訓導在任以師道自重樂於啓迪親之者懽然若挹春風瞻霽月也先生善屬文援筆立就作詩歌藻思清逸論者以太白樂天擬之一時文價大振求之者屢接外戶時總戎襄城

歐定四軍全書

章薦知太平府事遽以母喪去官矣遂歸家守制先生
舊有背疽已愈比服闋復發竟不治卒實丙子八月十
六日也春秋五十有六邇其生為洪武辛巳三月二十
三日先生在成均時號儲菴在內臺時號柏菴所著有
南京文稿吟稿人瑞軒集藏於家曾祖道益元延祐進
士祖安禮鄂州學正父伯頴號勿齋舉進士累官翰林
脩譔母劉氏娶曠氏卒繼鄧氏子四峻嶙嶙峒嶙卒女
二淑寧卒沛寧在室俱鄧出初葬樞山越八年遷葬河家

源南塘山天順癸未二月十二日也先生為人豁達豪邁坦易無城府與人交傾倒盡底裏樂周人急雖千金不惜人有患難必極力拯救之事親篤孝愛待宗族鄉黨有恩義先生在京校讌在弟子列受教良多深辱知愛獎許今不可作矣仰惟厚德昌勝永嘅峻來京師泣謂予曰先君之墓已有僉憲王公銘之矣然懸絳之石未有文以刻敢以屬墓表於先生無能為役則揭德振潛當效執筆第媿文辭蕪陋弗克揄揚而義又弗容讓

也乃為之表曰先生早以材選嚮用有待俯就儒祿為
養孝可嘉矣我薦臺端不畏彊禦毅以彈擊舉職忠可
尚矣然官雖挫而志不撓雖抑而名益振視彼首鼠脂
韋媚世取寵者賢不肖何如耶使天假之年必蒙簡拔
以酬平昔國家儲待之意而竟止於此抑命已考其平
生忠節信足垂家聲而遺世軌故特表之以示其後之
人

友義居士墓表

友義居士者何淮南畢公文德其人也友義者何公平
生惟義是務公既歿淮之士君子不忍復稱其字以其
樂施於人久而不變故私謚之曰友義也其為義者何
公貲甲於鄉不擅其有以周人之乏不憚其難以赴人
之急此其為義者然也義舉甚多未為悉也試言其大
者正統初朝廷募民輸芻粟助邊公慨然應詔致從子
瑛授職千戶身膺冠帶之榮丁巳徐淮大水民饑發粟
二千石賑之已巳朝廷命將南征士阻淮漲不可渡乃

造巨艘二於清河口濟之民有李氏婦以舅借隣牛死
欲賣身以償即代償之天順癸未黃學士廷臣謫廣沒
妻孥扶柩歸葬陝之蘭陽甲申夏舟阻淮上不能歸巡
撫王都憲公度吊而憫之詢可任其後事者淮之父老
咸曰非義士文德不可乃以託公即請籍實館于家買
地葬之市屋居其妻孥財物俾不失所成化丙戌民饑
粥子女者衆悉以善價收育立合券約歲豐還之鑿義
井十餘口以濟汲置義阡三區以便葬造橋四座以利


涉設義學清平坊以教貧家子弟施藥餌圓明寺以療
人疾疫婚無以娶者錢帛之死無以斂者棺衾之其汲
汲為義若饑渴之嗜飲食惟恐不及於是義聲溢於淮
甸雖販夫野婦皆知公之篤於義也尤好崇飾祠宇若
淮之雷聲殿杭之紫陽院正殿頽壞費鉅皆公為新之
又新三官祠紫霄紫極二宮玄妙觀徐節孝祠東嶽行
祠真武諸像或塗金或範銅用財不計亦義舉也四明
陳祭酒敬宗記其事甚悉淮陽高少保世用序其恩慶

之堂謂公寬惠行善如楊旬竇禹鈞平量助喪如李珏
郭震西蜀江少師時用亦云人之累貲鉅萬而貪得無
厭見人疾苦未嘗興一善念以周急之是乃守錢虜耳
視公所行得不汗顏乎時以為確論公諱德姓畢氏文
德其字也以字行宋司農卿世長之後至和間有曰公
叔者蘇文忠公嘗遺以手札今藏于家祖震始自姑孰
徙淮父昇名士母段氏公幼穎悟讀魯論未竟輒曉其
義師大奇之經史多所涉獵性孝友父蚤世母病醫莫

療每夕爇香于臂禱北辰願以身代病即愈與兄文貴
同爨五十餘年一錢尺帛不以自私治家雍肅咸遵禮
度其事先盡孝敬處宗族以和待賓朋以誠馭奴僕以
恩子玉敏而好學遣遊邑庠以明經中景泰癸酉鄉試
登天順丁丑進士第授文林郎知曲陽縣每貽書戒以
守官律身之道玉遵其訓有廉濟名公一日疾革語子
姪曰人之負高貲者貴積而能散也吾無益於世惟樂
賑施庶以行吾志焉汝曹勿厚自殖宜脩德以承之能

用以義斯善矣勉之勉之遂卒成化四年七月十三日也享年六十有五遠近聞之皆驚悼曰義士已矣自郡大夫而下赴吊者皆哭盡哀配程氏繼濮氏皆有淑德子一即玉娶裴氏女一適楊倫孫三永遠亨孫女二長適甘棠次許徐茂玉卜以次年正月初三日葬公鉢池山之原已得錢學士原溥之銘納諸壙矣茲復具事狀再拜遣使者來南京謁予文刻石墓道為不朽圖予與玉有斯文之雅而公之卓行不可不著之為世勸也乃不辭

而大書以表之曰茲惟友義居士之墓其平生義之形者乃其仁之發也其施恩於不報之地者蓋自有報者存也嗚呼君子哉若人尚德哉若人



倪文僖集卷二十六